



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 7

Parliament nung opposition MP temi Rahul Gandhi pelaa agizük

Cambodia PM jabaso-i pa melentsü chubai melaogo



VOL. XX NO. 296 (ADOK 296)

DIMAPUR SANGTENNÜ (TUESDAY)

LUROI (AUGUST) 08, 2023

₹ 5.00

Nagaland nung IMI 5.0 tenzükogo

Kohima, August 7, 2023 (TYO): Nagaland nung Hombarnü Intensified Mission Indradhanush (IMI) 5.0 tenzükogo aser iba ya nisung 2064 nem mozü agütsütsüba mapa lir.

Tanü Kohima kübok Urban Primary Health Centre (UPHC) nung Health and Family Welfare, Principal Director, Dr Vibeitunuo M. Sachü-i IMI 5.0 campaign tenzüktsü aser lai mezüngbuba dose agütsü.

"Universal Immunization Programme (UIP) kübok routine immunization akangshitsü atema IMI 5.0 tenzük. Iba campaign nung ita asem nung shilem asem lemsar tanur aser mashisa aliba tetsürtem nem mozü agütsütsü" ta Dr Sachü-i ashi.

Laisa civil society teloktem aser tamangba yimsü dak sendakba teloktem dang department den yariteptsü aser

tanur mesüra mashisa aliba tetsür ajak nem mozü agütsütsütsüba inyaktsü ayongzük.

"Onoki tanur shinga vaccine preventive disease ajanga timtem mesüdaktsünür. IMI ajanga Routine Immunization maparen nung medensemba tanurtem aser mashisa tetsürtem nem mozü agütsütsü" ta Dr Sachü-isa metetdaksü.

Iba campaign mezüngbuba shilem nung tanur 1155 (0-2 years), 730 (2-5) aser mashisa aliba tetsür 179 nem vaccine agütsütsü.

Tanabuba shilemji September 11-16 aser tasembubaji October 9-14 tashi agitsü.

Iba sentong nung State Immunization Officer, Dr Imkongtemsu Longchar menden liasü aser Medical Officer i/c UPHC Seikhaou Dr Bilva Yalie-i temoatsü meshia sarasadem.

Mkg DC-i NH 702D aser DPDB senden atema metetdaksür

Dimapur, August 7, 2023 (TYO): NH 702D nung Mariani nungi Dissoi/Tsurang Bridge tashi 10-Wheelers aser temaba garitem senzütsü melar ta Mokokchung Deputy commissioner (DC) Thsuvisie Poji-i metetdaksüogo.

Iba lenmang ya Border Roads Organisation (BRO) kübok adener aser lenmang junga lir ta Mokokchung DC-isa ashi.

Maneni, Mokokchung DC

asur District Planning and Development Board (DPDB) Mokokchung Vice Chairman Thsuvisie Poji-isa tanga sangdong ka nung August 2023 atema DPDB senden amentsü metetdaksüogo.

August 11, 2023 anepdang 11:00 ako nung DC indang Conference Hall, Mokokchung nung senden amentsü anungji DPDB züngsem ajak adentsü mepishir, ta pai ashi.

Dy. CM Patton-i Nagaland police mapatong 2 lapoktsü

Kohima, August 7, 2023 (TYO): Deputy Chief Minister (Home), Y. Patton-i Hombarnü police project ana lapoktsüogo.

Pai Commandant, 3rd NAP Battalion Tuensang office aser Superintendent of Police, Zunheboto office tem lapokja liasü.

PHQ Kohima nung Mini Conference Hall nungi online ajanga office tem lapoktsüdag Y Patton-i "state police indang tongti tebilemstüji ozüing alema inyakshiba azüoktsü aser ozüing inyakertem putettsü, drug khuret noktangtsü aser loktiliba nung tensa süngjema ayutsüba lir" ta ashi.

Iba nung Civil Society Organizations-i police den yaritepa district ajak nung tensa süngjema ayutsü mepishir, ta Deputy Chief Minister (Home)-i ashi.

"3rd NAP Battalion ya May 1, 1967 nü tenzük aser Assam o Nagaland tsüingda mangatettep adokdang parnoki takok ngua inyak. Iba dang 1985 Merapani Operation ta aja aser iba sülen 3rd NAP Battalion dang 'Tiger Battalion' ta naroküm jaloktsü" ta paisa ashi.

Parnok dang Ferocious 3rd ta-a ajar aser tangar tashi nungi Nagaland kümzüka ayur. 3rd NAP Battalion tenteter küm 55 tashi nübor tenzük arur aser senmang tajung mesamai dang

lia arudar, ta Y Patton-i ashi.

Zunheboto district ya taoba mapang Mokokchung District kübok liasü aser December 21, 1973 nü district balaka razüka ao ta Patton-isa metetdaksü.

Zunheboto Police-i public nungi teyari agia ozüing alema inyakshiba azüoka arur aser tawa Nagaland Assembly elections nung meimchir taküm den kiojen laluba kecha melii dang tembang ta pai ashi.

Taküm "War on Drugs" maparen inyaka arudang NDPS Act kübok ken o 26 benokogo aser nisung 40 puogo ta Patton-isa ashi.

Zunheboto district police-i lokti dak rangloker police mapa inyaka arudang tesüiba ita 9 tsüingda ken o 114 tashi benokogo aser iba ya tesüiba küm 12 tsüingda ken o teimtiba benokba alitsü, ta pai metetdaksü.

Zunheboto district police-i mapa tajung inyakba ajanga district nung Police Stations 2 tashi AFSPA nungi anitetogo ta Y Patton-isa shisem.

Chief Minister Neiphiu Rio lenisüba kübok state sorkari infrastructure renloka Nagaland nung nüboritem tajungba tenzüktsü atema ajungmesoa arur, ta paisa ashi.

"DGP Nagaland aser Police Department nung inyaker ajaki mapang shitak nung office ki

yangluba atema tenüngsang agütsür aser item office tasen lapokba ajanga police-i tali tajungba nung public yaritsü imlar" ta paisa ashi.

Iba sentong nung Housing & Mechanical Engineering Minister P. Bashangmongba Chang-i Nagaland state nung Police Battalion tem rongnung 3rd NAP Battalion ya tajungtiba rongnung ka lir ta ashi.

"Office tasen lapokba ajanga iba Battalion nung alir ajaki tejak mereprangi aser mebendangi Law & Order tiptema ayutsü tamang akar" ta Minister Bashangmongba-i ayongzük.

Food & Civil Supplies and Legal Metrology Advisor K T Sukhalu-i SP office Zunheboto tasen lapokba ajanga district police-i nübor tajungba nung tenzüktsü imlar ta ashi.

Paisa Deputy Chief Minister dang Zunheboto nung aliba 8th NAP Bravo Coy nem teyari tajungba agütsütsü mepishi.

"Nagaland state police battalion tem infrastructure peria mali aser iba jagi mapatong aika teinyakdak lir. Iba atema department-i Ministry of Home Affairs dang nungi senotsü teyari meshitsü merangdar" ta Nagaland DGP Rupin Sharma-i ashi.

Office tasen ana yangluba ajanga police-i mapa tajungba inyaktsü imlar, ta paisa shisem.

Ao Kaketshir Mungdang (AKM) o Emporium na tenangzüktepba ka agiogo



Ao Kaketshir Mungdang o Emporium na tenangzüktep ka agiba mapang tangokba noksa nung angur.

Mokokchung, Aug 7 (TYO): Lanurtem nem maongka lapoktsütsü nükjidong nung Ao Kaketshir Mungdang (AKM) o Emporium Training & Consultancy Pvt. Ltd. (ETCPL) na tsüingta 7th August, 2023 nü tenangzüktep (MoU) ka AKM office nung agiogo.

Iba MoU ya küm 5 atema asütsü aser MoU nungji AKM tenüing nung tir, Lanutoshi Aier

asur ETCPL tenüing nung ETCPL Operations Manager, Anirban Mukherjee nati sign süogo. Tanü iba MoU sign asüdag ETCPL Nagaland, CEO, Temjenkala-a densema liasü.

AKM den ibala mesükba riju (institute) balalai külem sür inyaktsü asüingdanga liasü, anungji, item riju balalatemji asadanga aonung, Emporium Training & Consultancy Pvt. Ltd.

yagi Naga nunger rongsenkettsüing den sütepa maongkaji agütsüteter, aser yangi training agiba taah jia tangar dang nungi kanga agi tajemba agütsür, anungji, ibai asenok asoshi tapetba asütsü ta sür AKM Sanen Luden nung lemteta liasü, ta AKM tir, Lanutoshi Aier-i metetdaksü.

Iba mapatong ajanga Mokokchung district dang masü saka asen kidanger tanga district-tem dena talisa lanur zünger mapa inyaktsü maongka menguteti alir aika tajangzük angutsü imlar. September ita nungji iba dak sentakba nung shisa lensayu (career guidance) sentong ka yangi Mokokchung nung ayongzük akatsü, ta AKM tir-i ashi.

Mokokchung nung lanurtem pei azüingba yari itasen mangur aika angur, yamaji ano lanurtem aika sempeta lir aser tazünga zünger sürnung mapa inyaktsü maongka mengutetertema aika lir, saka tebilemstü kaji maongka jenti liaka, asenok aikadi bendangleni or mapa meinyaknür/melinür, ano chirnurtemibo onür sürnung tsüraburi meyoknür ta timtem ajuruba lir, ta paisa ashi.

Tanü joko sorkari tazünger

ajak nembo sorkar mapa magütsütettsü aser asen lima mapa inyaktsü maongka peria maka, anungji, India/bendangleni or pei sempet sayua pei taküm jenjang yanglutsüba kanga tongtibang lir, ta paisa shisem.

AKM amala mera taket lokti ka den külem sür inyaktsüsa maongka ngutetba asoshi pelar aser iba asoshi mapang talangka nungi yongya ataogo, ta ETCPL Operations Manager, Anirban-i metetdaksü. Tang tashi nung ETCPL ajanga Naga nunger meyi 20 dak tali nem training agütsüogo aser item rongnung aika India aser bendanglima mapa takok ngua inyakba kuli lir, ta ashi.

Nagaland nung ETCPL Centre ya Dimapur nung amenoka lir. Iyongji aiben Dimapur aser Kohima purtem dang maongka teimba agia arur, aji oda, tanga district nunga lanur sempet aketer aika alitsü ta onoki amanger, anungji, AKM den MoU yangluba ajanga Mokokchung district dang masü saka tanga district dena tajangzük angutsü imlar, ta paisa ashi.

Nagaland nung mapa manguba tebilemstü ya ulura, anungji, AKM aser Emporium na lungjemer

inyakba ajanga lanurtem maongka jenti angutsü imlar, talisa koda masür kibongtem asoshi ibai tajangzük tulu asütsü, ta ETCPL Nagaland, CEO, Temjenkala-i metetdaksü. Tanü tashi AKM-i mapatong balala takok ngua arudar, yamaji iba yaa takok angutsü amanger, ta laisa shisem.

India nung ETCPL ya tenzük küm 17 shi arur aser Nagaland nunga ETCPL center ya 2018 nung lapok. ETCPL tenzük tanü tashi arudang skill development tsütsü talisa Aviation, Tourism, Hospitality aser Customer Service Sector-tem nung training/mapa balala agüja arudaki. ETCPL nung training agitsü atema tazüingbaji tajemba agi class 10 bo ajanger asütsüla. ETCPL-i training course balala agütsür. Iba dak sentakba nung osang tejanga metetnürtemi AKM ketdangpur den tongteprateptsü akok.

Tawa terenlok osang tajung kaji - IDAN den külem sür mapatong ka tenzüktsü lir, ibaji talisa koda masür kibongtem nem skill loan ta sür teyari ka agütsütsü, iba teyari agir jagi pa/ la training temer mapa ngur külen sentsüh ji aotsü. Nüburtemi iba maongkaji agitsü akok.

Loyir yimtsüung nung Zhaleo Rio-i Medümnyio benjongmung moatsü



Loyir yimdaq August 7, 2023 nü Medümnyio benjong amungdang Zhaleo Rio, IAS (Retd.), Advisor, UD & MAD, Nagaland ajanga lokti den jembidang tangokba noksa nung angur.

Dimapur, Luroi/August 07 (TYO): New Showuba kübok Loyir yimtsüung nung Yimkhiung Naga nung August 7, 2023 nü Metumnyo (Medümnyio) benjongmung nung tesemdang tongti ka ama Zhaleo Rio, IAS (Retd.), Advisor, Urban Development & Municipal Affairs Department, Nagaland dena liasü.

Iba tebour tajung benjongmung ya August ita tenzüker mezüng hopta nung amunger.

Iba sentong nung jembidang, Medümnyio ya Yimkhiung Nagas nung asoshi tongtipang benjong ka lir, aser ibai tanüla aser temang aser ano alu mapa meshitetba dak sendakba lir, ta Zhaleo-i ashi.

Iba benjong ya Angami Naga nung Sekrenyi benjong den mesükteper, kong danga inyakyim balala den külemi pei meshitetba tongtipangtiba lir, ta pai ashi.

Advisor Rio-i nüburtem dang temolung mürektetsü aser alima asoshi tatishitsü tajung kaka asütsü ayongzüük.

"Item benjong ya asen ayak asoshi tongtipang shilem ka lir, anungji asenoki amshitsüla, angazüksüla, lemsatepsüla aser lanu putu nem angazükdaktsütsüla," ta pai ashi.

Paisa Naga nung tsünta sobaliba aser yimsüyimbong tali temaba jenjang nung ajungkettsü ajungshia liasü.

Telungjem, temelenshi aser terenlok bener arutsü mechi

asenoki 'ism' amadoktsüla, ta pai ayongzüük.

Advisor Rio meina G. Ikuto Zhimomi, Advisor, Land Resources Department, Nagaland; Sara S. Jamir, DC Niuland aser NDPP central aser region ketdangsurtem aser par 5 Ghaspani-II A/C nung lenirtem arua liasü.

Iba sentong nungsa Advisor Rio-i Loyir yimtsüung nung nisung taintem tsünta volleyball asaya ka sayatsü.

Iba benjongmung ya Loyir Baptist Church indang Church Building Construction Committee ajanga ayongzüka liasü, kong H. Ramtsüla menden liasü aser Dr. James, Pastor, YBC Diphupar ajanga Tsüngrem temoatsü jazüka sarasadem.

Governor-i Metemneo benjong salem lemsatep

Dimapur, Luroi/August 07 (TYO): Yimkhiung kin nungi adianu aser adianutsür tem dangi Metemneo benjong salem abener, ta Nagaland Governor, La Ganesan-i sangdong ka nung ashi.

Tsüksüung-ensünga alu arutsü asoshi asenoki temaba nungi temoatsü meshia aser asen mapa inyakdang

amshiba hadir moaja iba benjong amungdang, tesunep, yimchiyimjung aser anema aliba temoatsü nüburtem madak lidakjangma.

Iba benjongmung nung ni nenok ajak asoshi tepela aser takokba lidakjang ta moatsür, ta Governor-i sangdong ajanga ashi.

Rules Committee züngsem senden ayonger

Dimapur, Luroi/August 07 (TYO): Nagaland Legislative Assembly indang Secretary-In-Charge, Khruohituonuo Rio-i sangdong ka ajanga ashiba agi, Rules Committee indang senden ka August 11, 2023 anepdang 11:00 ako nungi tenzüka amentsü.

Iba senden ya Nagaland Legislative Assembly Secretariat

indang Committee Room nung amentsü.

Iba senden ya Speaker aser Rules Committee indang Chairman, Sharingain Longkumer-i ketdang süa agitsü.

Anungji iba senden nung Committee züngsem ajak medema arua adentsü metetdaksür, ta sangdong ajangasa ashi.

Kohima Press Club ajanga asükhu lemsatep

Kohima, Luroi/August 07 (TYO): Kohima Press Club (KPC) züngsem Yirmiyan S. Arthur Yhome tetsü Ayao Arthur mapang tatsüka shiranga arur August 2, 2023 nü New Delhi nung asüba osang angazüka temolung shiranger, ta KPC Joint

Secretary, Ozunglemba Jamir ajanga sangdong ka nung ashi.

Mangyimer kibong den asükhu lemsateper aser parnok nem Tulusang Tsüngremi temolung nung anisüngzüük agüjang ta sarasademtsür, ta sangdong ajangasa ashi.

Mokokchung district nung IMI 5.0 tenzükögo



Dimapur, Luroi/August 07 (TYO): Mokokchung district nung Intensified Mission Indradhanush (IMI) 5.0 immunisation drive phase mezüngbuba August 7, 2023 nü Chief Medical Officer Mokokchung indang Conference hall nung tenzüka liasü.

Dr. Pangjung Pongen, SBCC, UNICEF lia iba Intensified Mission Indradhanush (IMI) 5.0 immunisation drive ya district asoshi Dr. Kibangkumba, Chief

Medical Officer, Mokokchung ajanga semzüksü.

Iba mapang CMO Mokokchung ajanga Health workers tem dang routine immunization mapang mayimjemba nüburtem dak rangloker immunization noklang nung noklang shilem takok angutsü ajungshi aser ano kishizüung tonga aotsü nenshia ashi.

IMI 5.0 mapang Mokokchung district nung mashisa tetsür ti aser tanur arishi küm 0-5 tsünta 142 nem mozü agütsütsü nükjidong lir.

State nung Lumpy Skin Disease nungi jenbua alitsü lenmang sayur

Dimapur, Luroi/August 07 (TYO): Lumpy Skin Disease (LSD) ya mamatzü agütsüba/tezü aketba (cattle) shiruru dak menatepa aoba tashidak ka lir, koba Capripox virus ajanga adokdaksür.

Iba tashidak ajanga temang metar aser iba sülen temang nung komo ama telong adokdaksür. Iba komo telong ya telungzüük centimetre 2 nungi 5 tashi alir aser iba ya ajanga mamatzü tajemba kumdaktsür, tashi ajemdaktsür, tanur raksa indoker, tapong akumer aser shiruru shishilempaba tsütsü rongsenketzüng akoksatsür.

Iba tashidak ya merila, manga, meji aser azüböng amala shiruru nungi menatepa aor aser azüöksü kanga tasak lir.

LSD tashidak menatepa aoba

nungi kumzüksü mesüra jenbua alitsü asoshi nüburtemi item mera agütsüla:

1. Iba tashidak keta aliba shiruru tesem balaka nung ayutsüla.
2. Takep nung tashidak keta aliba shiruru tem farm nung manioktsüla.
3. Shiruru telok moapu nung rem chidaktsüba ajemtsüla.
4. Insecticides aser repellents amshia tashidak menatepba shiruru azüöksüla.
5. Anema aliba shiruru dak ectoparasiticide mezütsütsüla.
6. Farm aser shiruru belenbaga nung mesen tepsetba mozü mezütsüla.
7. Tashidak keta aliba shiruru anepaludang protective gear amshitsüla.

8. Bio-security mera takang agütsüla.
9. Tashidak adoka aliba tesem anasa 'cattle markets' shibangtsüla.
10. Tashidak menatepa aoba azüöksü mechi shiruru takum ayokba, fairs, shows amala nokdangtsüla.
11. Nashi ki temeket nung natzü aser tzü atsünga aliba yimdokdaksütsüla.
12. Shiruru tasen ita ka quarantine asütsüla.
13. Shiruru tasü indokba nung scientific yimya amshitsüla.
14. Clinical surveillance atema Veterinary Health Centers nem osang agütsütsüla.
15. Nüburtem nem awareness agütsütsüla.



Self Employed Women's Association (SEWA) ajanga Agriculture Department of Shamator den lungjemer August 5, 2023 nü Shamator Town nung 3 buba Millet Festival 2023 takok ngua mungogo. 2023 ya International Year of Millets ta sangdonga aliba den lirumedema iba benjong munga liasü, kong millet grinding machines tem lema agütsü.

Matamabensai aliba kaketshir tatidang atema metetdaksür

Dimapur, Luroi/August 07 (TYO): Nagaland Board of School Education (NBSE) ajanga Class VIII aser Class IX Examinations 2023 agütsütsü aliba matamabensai kaketshir aser Heads of Registered Institutions dang sangdong ka nenshia agütsüogo.

Iba sangdong ya Students with Disabilities (Notification No. 30/2022; www.nbsenl.edu.in) dak sendakba Rules den apet tatidang nung 'exemptions' asoshi application agütsütsüba indang lir.

Applicants/kaketshir temi pei application ya pei azüngba Head of Institutions ajanga

Application nungya Health & Family Welfare Department (Notification No.66/2023; www.nbsenl.edu.in) ajanga agütsüba Disability Certificate adentsüla.

Iba maparen yaritsü asoshi application ya email ajanga Class VIII atema cwsnclass8@gmail.com aser Class IX atema cwsnclass9@gmail.com dangi yoktsü akok.

Application ajak August 31, 2023 tashinung agütsütsüla aser iba sülen aruba application kata magizüksü, ta sangdong ajanga ashi.

Parliament nung opposition MP temi Rahul Gandhi pelaa agizük



August 07, 2023 nü New Delhi nung Parliament kima Congress MP, Rahul Gandhi-i Mahatma Gandhi nem akhüm agütsüdang tangokba noksa nung angur. 2019 küm tenüng menüksüba ken o ka nung Supreme Court-i pa maitsüba sülen Hombarnü pa tanaben Lok Sabha nung züngsema aniokogo.

New Delhi, Luroi/August 07 (Agencies): Hombarnü Congress party lenir Rahul Gandhi Parliament telungi aiba mapang nung Congress aser tanga opposition party tem nungi Lok Sabha MP temi pa pelaa agizük.

Rahul Gandhi anüingdang 12:00 ako meta Parliament House complex tonga aruba sülen indangindanga Mahatma Gandhi kürakyanglu anasai oa asür nem akhüm agüja liasü.

Iba sülen Congress MP tem aser opposition teloktep-INDIA nungi MP temi

Parliament gate number 1 nung nokdaker pa pelaa agizük. 2019 küm tenüng menüksüba ken o ka nung Hokolbarnü Supreme Court-i Rahul Gandhi maitsüba sülen Hombarnü Lok Sabha Speaker, Om Birla-i pa tanaben MP agizükogo.

Taküm March ita nung Surat nung aliba court kati iba ken o nung Rahul Gandhi aitsü aser küm ana tepuokdak ayutsü obendang agüja liasü. Iba sülen pa MP nungi anendakja liasü.

Ajisüaka August 4, 2023 nü Supreme Court-i iba ken o

nung pa maitsüba ajanga pa tanaben Lok Sabha nung anioker.

Hombarnep Lok Sabha Secretariat-i sangdong ka ajanga, Gandhi MP nungi anenja aliba agienadoker aser pa tanaben anioker, ta metetdakja liasü.

Iba sülen Congress Tir, Mallikarjun Kharge-i twitter ajanga, "Rahul Gandhi tanaben MP anioktsü atema telemtetba agibaji onoki pela agizüker. Iba ya ajanga India nunger, talisa Wayanad nung alirtem anisüngzüker," ta metetdaksü.

Rajya Sabha senden nung Amit Shah-i Delhi Services Bill benok

New Delhi, August 07 (Agencies): Hombarnü Rajya Sabha nung Union home minister, Amit Shah-i Delhi Services bill (Government of National Capital Territory of Delhi (Amendment) Bill, 2023) benokba sülen rongrong adoka liasü.

Iba bill anema Aam Aadmi Party MP Raghav Chadha-i, iba bill agizükba tetetzü Supreme Court akhüm-metsübuba lir, ta ashi.

Raghav Chadha-i, Delhi services bill ya ajanga LK Advani aser Atal Bihari Vajpayee ama BJP lenir taintem ashioksür, kechiyong Delhi nem state jenjang agütsüsü atema 1977 nungi 2015 tashi meranga inyakbaji BJP lir, ta ashi.

Paisa, Delhi assembly election mapang nung BJP manifesto nung Delhi atema state jenjang akhangtsü metetdakja lir, ta ashi.

"Iba bill ya democracy aser linük temzüng alema dang masü saka Lal Krishna Advani, Atal Bihari Vajpayee, Madan Lal Khurana, Sushma Swaraj aser parnoki küm 40 tashi inyaka aruba mezüngmeshi lir," ta Raghav Chadha-i ashi.

Paisa, "BJP-i tesüiba küm 25 tashi Delhi nung takok manguba ajanga Centre-i ya inyaker. BJP-i state election 6 tashi nung tamakok angu, 2015 aser 2020 küm nunga tamakok angu. Taruba küm 25 nunga parnok takok mangutsü, ta parnoki meteta dang lir," ta ashi.

AAP MP-isa, "Delhi services bill ya yimtenren tsütsü nungi tashioksüba ka lir, linük temzüng tsütsü temenen lir aser iba ya ajanga yimsüsübaren

nung timtem agütsüsü," ta ashi. Rajya Sabha senden nungsa Congress MP, Abhishek Manu Singhvi-i, "BJP-i kechi südir süaka tashi aginer. Iba bill ya linük temzüng alema lir, democracy inyakyim anema lir, iba ya regional ola aser Delhi nung alirtem taginüba anema lir," ta ashi.

Ano külen BJP MP, Dr Sudhanshu Trivedi-i, Supreme Court tetuyuba nung, iba onük nung Centre-i ozüng yanglutsü makok ta shia mali, ta metetdaksü.

Paisa, "Supreme Court obendang tapak 105 tashi nung agütsü aser kecha nunga Delhi atema ozüng meyanglutsü atema shia mali. Supreme Court tetuyuba, tekong 86, 95 aser 164 F nung, Delhi atema ozüng yanglutsü atema Parliament dak tashi lir ta shia lir," ta metetdaksü.

Hombarnep Aam Aadmi Party (AAP) aser Congress nati MP tem dang Rajya Sabha senden matem tashi ajak senden nung adentsü tuyua liasü.

Delhi services bill ya Lok Sabha nungbo agizükogo ajisüaka INDIA teloktep nungi lenirtemi Rajya Sabha nungbo iba bill ya nokdangtsü meranger.

Rajya Sabha nung BJP-i aniba NDA nungi MP 100 dak tema lir aser BJD den YSRCP-ia iba bill pusemstsü ta sangdongogo.

Osangbenertem den jembidang Gujarat AAP lenir, Isudan Gadhvi-i, "Delhi nung alirtemi küm 25 tashi BJP nem sorkar tashi magütsüba agi BJP-i Delhi LG ajanga Delhi sorkar anema inyaksü meranger," ta metetdakja liasü.

India nungkeyi nütsüngrenloka 1,411 aliba nungi tangbo 3,682 lir

New Delhi, Luroi/August 07 (Agencies): India nung keyi nütsüng kanga renlokogo; 2006 küm keyi 1,411 aliba nungi 2022 küm tashi nungbo keyi 3,682 lir, ta Hombarnü Parliament nung Centre sorkari metetdaksü.

Lok Sabha nung tasüngdangba ka langzüdang Union Minister of Culture, G Kishan Reddy-i iba osang ya metetdakja liasü.

Reddy dangsa, linük nung ozü, naro mesüra shiru kar 'national bird, national flower

asere national animal' ta agüja ali asü, aser itemji kümzüksü atema inyaker asü? ta asüngdanga liasü.

Ibaji langzüa minister-i, Ministry of Environment, Forest & Climate Change (MoEF & CC)-i sangdongba ama India sorkari keyi ya 'National Animal' aser peacock ya 'National Bird' ta sangdonga lir, ta metetdaksü.

2011 küm May 30 nü Ministry-i, keyi aser Peacock na ya 'National Animal' aser

'National Bird' ta nenshia sangdongogo, ta paisa metetdaksü.

"Keyi aser peacock na ya Schedule-I animals of the Wild Life (Protection) Act, 1972 nung züngoka lir, anungji shiruru ana ya shikarir tsüngdang nungi kümzüksü atema kanga nendaka inyaker. Iba dak alia item shiruru aliba kanga tongtibang tesemtembo 'Protected Areas' ta sangdongogo," ta minister-isa metetdaksü.

Lok Sabha senden nung Data Protection Bill, 2023 agizükogo

New Delhi, August 07 (Agencies): Hombarnü Lok Sabha nung opposition MP temi longkak taitdak mapang nung Digital Personal Data Protection Bill agizükogo; iba sülen opposition MP tem senden nungi ayazüka ao.

BJP MP, Nishikant Dubey-i Congress party aser Rahul Gandhi nem tai tonglokja jembiba sülen Lok Sabha nung Congress lenir, Adhir Ranjan Chowdhury densema tangartemi iba onük nung

langzütsü merang saka memelaba agi parnoki senden nungi ayazüka ao.

Biju Janata Dal MP, Bhartruhari Mahtab-i, senden nung rongrong adoka ka aliba mapang nung bill agizüktsü makok ta metetdakja liasü.

Digital Personal Data Protection bill benoka ghonda ka shi o lemtepa sülen iba bill agizüka liasü. Minister for IT & Electronics Ashwini Vaishnaw-i iba bill benoka sülen party balala nungi MP 8-i jembia liasü.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND : KOHIMA**

Dt. Kohima, the th Aug., 2023

NOTIFICATION

NO. DTE/ESTT-2/NEET/01/2021-22/: This is to inform the NEET (UG)- 2023 appeared and registered candidates whose merit falls within 1 to 200 for general category(Advanced Tribe) and candidates belonging to Backward Tribes whose merit falls within 1 to 648 are invited to attend the spot Counseling scheduled on 18th August, 2023 at 11:00 AM in the Conference Hall of the Directorate of Technical Education, Nagaland, Kohima below New Secretariat, to fill up the reserved seats given in the table below. Selection will be purely based on NEET (UG) - 2023 merit, options/preference exercised by the candidates.

Sl.No	NAME OF COURSE	NO.OF SEATS	REMARKS
1	MBBS	152	
2	BDS	12	
3	BASLP	1	
TOTAL		165	

NOTE: 1. Candidates are informed to bring 2 (two) passport photos and original documents and reach the Spot Counseling venue latest by 10:40 am.
2. Candidates failing to attend the said Counselling on the specified date and time shall forfeit their candidature for selection to the seats given above.

(ER. VIPULHOU LHOUNGU)
Director



August 07, 2023 nü New Delhi nung External Affairs Minister S Jaishankar aser taoba mapang Mongolia Tir, Enkhbayar Nambar na senden amentsü lia tangokba noksa nung angur.



TIR YIMYIM YIMOBILEM (EDITORIAL)

DIMAPUR SANGTENNÜ, LUROI(AUGUST) 08, 2023

Nagaland asoshi osang tajung ka

Asenoki dang junga matalokdaktsüteter dang ashi, Nagaland asoshi Delhi nungibo sentong tajung den sen peria yoker. Item sentongtem rongnung kaji, tang linük nung railway station 508 tashi alimaia hau ta asütsüsa tuluba aser tajungba yanglutsüba nung Dimapur railway station-a tendaktsüba ya asütsü. Tawa iba yimobilem nung lemsatepba ama, India nung railway station tejentem rongnung Dimapur railway station yaa ka lir. Aji oda, tanga state nung asünungbo Northeast nungbo Guwahati railway station den toktepa ulutsüba aser ajungtsüba railway station-ji Dimapur railway station ya asütsü. Ajisüaka, asenoki train ajanga nübortem nem tajangzük bener arutsüba indang memetet, anungji süoki ia mebilemer dang ashi, nisungtem nungdak peria bener arutsüba aser bener aobajibo train ya dang lir. Atangji, tanü asüngbo asenoka train nung senzür aika kümogo, ashi yashi tashi asenok Dimapur nungi Guwahati aotsü asoshia train nung ayongayonga mejanger aotsüba ser nung train nung mesenzübaba agi bus nung timtema aonung piyong jajaa liasü aser tanga jajar. Ano, asenoki train station liaka temulung magütsübaji asen lima nungi asenoki tanga bendangleni train nung yoktsüsa kecha mezäsentet aser meyanglutetba dang masü, tangalen nungi asen meyong khu train nung arutsüsa shishilembaba mapa kecha meinyaker. Ajisüaka, asenoki mashi aser memetet, anungji meinyaker dang ashi, asenoki anogo shia achiba jang, alo, dal aser beas ajak ya tsumartemi train nung bener arua asenok dang ayoker. Aji oda, parnoki alo beas ya train nung bener arua ki tulu nung tokdena ayutsü aser aiben jenjang tur ayoktsü atema tiyazü maka kumdaktsür. Itemji dang masü saka süng aser long ajak train ajanga abener. Item business tulutemji asenoki meinyakdangba agi asenoki asen limai train aru maru mejangjar, kechiyong asenok asoshibo nungdak madoker. Item tajangzüktemji dang masü saka railway nungsa government mapa teimba adoker aser railway yabo center-i dang repranger asünungji ita sena tulu agütsür. Aji oda, railway nung mapa tapu balala ajak nung asenok ama ST purtem asoshi shilem balaka shiteta lir. Ajisüaka, Dimapur nung railway station aliba agi Naga nungertema kwika mapa ngua aliar ashitsü makok. Ashiko, railway station aoker dena tsumartemang shima alitsüa akok, kechiyong Dimapur railway station nung Naga nungerbo shinga inyaka mangur. Ano, railway station nung süngojemdak aser chiyongdak lapokba ajak tenungbo Naga nunger saka tsumartemi dang inyakba angur. Atangji, tamalen asenoki item maongka aser temoatsütemji arua lir ta memetetba agi magitet südi. Ajisüaka, tangbo kodang Dimapur railway station ya tang dang nungi asemsü agi tuluba kuma tajungba yangludir, train-a teimba senzütsü, anungji nisungtema teimba oli aruli jajatsü. Iba amaji mapa inyaker tema kanga agi teimba shimtsüsa adoktsü. Idangjibo asenok Naga nungertema Dimapur railway station nung IV grade nungi tenzüker ketdangsertem aika inyaka angutsü imlar. Idangjibo, Dimapur railway station nung süngojemdak aser chiyongdak ajak Naga nunger lanurtemi anepalua angutsü imlar. Tangbo asenok tilarterm kar train nung jajaba dak alaka yimsüsür aser tulartembo tayimtsü nung mesüra pei gari nung dang jajar, iba jagi train station-i aoba lenmang aka kata junga anepalu mesütet, kibur maliba lenmang amato kümer lir. Akjisüaka, Dimapur train station tuluba aser tasenba jagi aodangbo lenmang sentsüprangba agi lenmang nung pei tanülaa ngua aotsü imlar. Aji oda, idangjibo Naga nungertemi zäsentetba aser yanglutetbatem train ao shia süngasünga bener yoktsü imlar. Kasaji, train station tuluba nungjibo Naga nungertem asoshi bener aruba jangotsü, shi ango, chiyongtsü, cement aser kiosettem tapu ajak tangari masü saka Naga nungertemi bener aruba asütsü imlar. Item maongka aser tajangzüktemji asenoki magitetra, Dimapur nung train station tuluba aser tajungba kuma lapokyonga pi bendangertem junglatsü atema lapoktsür asütsü.

OLEMSABANG

OSANGTSÜSANG TONGTEPRATEP (MEDIA) YA KANGA KÜMDANGA AMSHITSÜLA

~ L. Kika Pongener.

Putu aika asenok osangtsüsang tongtepratepdak aser metet-peladak sabang ka makaba ajanga tenük tapok amai lia aruogo. Ajisuaka, alima melenshia aoba den, asenok nisunger libaliroba jenjang tajungba kuma melenshia aoba ajanga, tanübo osangtsüsang tongtepratepdak sabang (Platform) peria dang akaba agi alima ya tila ka amai dang kumadokogo. Aji oda, Newspaper, Television, Internet, Mobile Phone, Whats App, You Tube, etc. yamala 'Social Media' sabang peria akaba ajanga tang alima nung kechi ataloker, item ajakji second-minute tsungda nung meteta-adoker. Alima nung tajung suaka tamajung suaka kechi ataloker aji second-minute tsungda nung alima sunga-adoker. Anungji asenok libaliro nung tajangzuka aika dang lir, saka ano timtema aika dang ajurur. Anungji asenok ajaki kanga junga angatetsübaji, nisung ajaki 'Social Media' ya kanga kumdanga amshitsüla. Talisa, WhatsApp & YouTube item ya kanga kumdanga amshitsüla, kechiyong Social Media ajanga asenok nem tajangzuka aika agutsür, saka ano mekumdangra lendonga keta lir. Asenoki mekumdangi amshira Social Media ajanga kin o kin tsungda, yimtsüng o yimtsüng na tsungda aser nubur tsungda nung rara, lendong aser ken o tulu adoktsü.

Asen lima nung nuburtemi Social Media amshitsü meteta kümar külen, tangar lima nung benshiba yimyatem ajizuka inyaka benshidang asen loktiliba nung aser asen nubur tsungda nung ken o mangatettep kanga bulua adoker. Talisa, yimden nung, loktiliba balala nung ken o telemtetba agiba ajunga yak-yakta Social Media nung prokshiba ajanga khen khenbo telok o telok tsungda nung ashishiteptsüsa ken o-a bulur. Aji oda, yak-yakta osang prokshiba jagi mapang kar nungbo tajangzük melena timtem-ang bentsür arur. Ano mapang kar nungbo lokti-tentet tsungda nung obendangdak sabang (Court) tashi nung ken o kaateptsüsa tensa tia-a ajurur. Anungji koba telok nung kechi ken o telemtetba agidir agiaka, yimjak nung tai tatok nangzükdaktsütsüla ken o kar dak alaka, nungko-penteta Social Media nungbo meperokshiba-ang tajungba asütsü. Aji oda, Social Media ya nisung kar maaksudaktsüba sabang, mesura nisung kar nungko-bentettsüba sabang ka amai mamshi-ang tajungba asütsü. Tanü asen loktiliba nung tila-teri ken o telemtetba agiba ajunga, yak-yakta Social Media nung prokshiba jagi tajangzük dang nungi timtem-ang tuluba bentsür arur. Anungji kokrabangla, Social Media nung lokti-senden (Meeting-sitting) alitsüba osangtsüsang (Information) tongtipang kar dak alaka, lokti telemtetba ajakbo mesangdongba tajungba asütsü.

Alima tesem kar nung lendong, mepetmesu aser rarapangsen kar atalokra, yakta dang Social Media ajunga shibanga-adoker, kechiyong Social Media yagi kin o kin tsungda tsükchitep aser rongrong tulu adokdaktsütsüsa mapa tulu inyakteter. Alima tesem kar nung, telok o telok na, kin o kin na tsungda nung ken o tila-teri mangatettep kar adok nung, iba osangji noksa dena second-minute tsungda nung alima asünger. Ano mapang kar nungbo nisung tamajunger karibo lendong tulu adokdaktsütsüba (Situation Create) mechi nung, akhidang atalokba noksa kar tangang atalok amai yanglushir perokshir, aser ibajagi kin o kin tsungda mepetmesu tulu adoka nisung taküm tashi tepseta rongrong adokdaktsür. Ajiser, nisunger shisatsü nung mangyangtsüba shisatsü tamajung mit adokdaktsür. Anungji Social Media yamekumdangi amshira alima nung nubur tsungda nung lendong tulu adokdaktsütsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ICC-i India nung aliba yimtsüngtem atema Laishiba 2,000 agütsü



India nung kanga tezülen aliba yimtsüngtem nung inyaker pastor temi ICC ket nungi cyle anguba sülen tangokba noksa nung angur.

Washington D.C August 07, 2023 (Agencies): India nung kanga tezülen aliba yimtsüngtem nung Arogo tenzükertem senzüsempogtsü tasak aser Laishiba angutsü kanga tasak, ibayongji International Christian Concern (ICC)-i pastor 20 nem bycycle

20 agütsüba den Arogo züngsemtem atema Laishiba 2,000 agütsüogo, ta ICC-i metetdaksü.

Pastor tem peipei yimtsüngi meyipa aoba sülen parnoki Arogo züngsemtem nem Laishibaji lema agütsüsü, aser ibaji ajanga tamangertem

tanela nung aintsü, ta ICC-i metetdaksü.

India yimtsüngtem nung Khristan lenirtem nungita yaritsü atema ICC-i Bikes & Bibles program ya tenzüka liasü aser iba program kübok parnoki mapang shia cycle aser Laishiba agütsür.

Franklin Graham-i UK nung maneni 'God Loves You' sentong agitsü

August 07, 2023: Nüngtugu sayutsüngir, Rev. Franklin Graham-i maneni United Kingdom nung "God Loves You" tour agitsü.

Laishiba nung ajemdaker pai kasa tebur o tebur na mesüra tetsür o tetsür na shi nung medemba aitsüba ajanga pa sentong agitsü aliba tesem kar thinenja liasü; iba ken o nung pai takok anguba sülen pa tanaben UK-i oa iba tour agitsü.

Brihostibarnü Billy Graham Evangelistic Association (BGEA)-i sangdong ka ajanga, iba sentong agitsü atema parnoki ano tesem ana bendenlokogo; mezüngbubaji nung taküm August 26 nü ExCeL London convention center nung agitsü aser tanabubaji June 22, 2024 nü Glasgow, Scotland nung aliba OVO Hydro arena nung agitsü, ta metetdaksü.

London nung ayongzükba sentong nungji 15 ben tashi Grammy award angur CeCe Winans, asembeben tashi Grammy angur Michael W. Smith aser Grammy award atema nominate asüba telok Newsboys-i ken atentsü.

BGEA-i ashiba agi, August nung agitsü aliba 'God Loves You' tour atema parnoki London nung aliba Arogo 1,000 shi den ayongteper inyakdar.

"Taküm ano maneni London-i aotsü aliba aser

Glasgow nung Khrista osangtajung sangdongtsü atema maongka anguba atema onok pelar," ta Franklin Graham-i sangdong ka nung metetdaksü.

"Tesüiba küm ishika Khristan meyirjang aika aser Arogo noklang aikati onok den amalitepa inyakba atema pelar. Parnok aliba yimitem nung iba sentong agitsü atema parnok maneni sarasadema arudar," ta paisa metetdaksü.

Yaküm BGEA sentongtem ya UK kübok Liverpool, South Wales, Sheffield aser London yimitem nung agia liasü.

"Yaküm nisung noklang aika Khrista dangi aruba onoki kulisüa nguogo aser maneni London aser Glasgow na nung nisung aikati Tsüngrem temeim osang angashitsü atema maongka anguba ya Tsüngremi mapang tetemsü asütsü," ta Graham-i ashi.

London Baptists Regional Minister, Rev. Hany Abdelmasih-i, 2022 küm God Loves You tour ya London nung alirtem aika atema temoatsü mapang ka liasü, ta ashi.

Rev. Hany-isa, "London ya nenoki alima angutsü tesem ka lir aser Khrista osangtajung maneni nungdakba tesem ka lir. Rev. Franklin Graham aser taküm 'God Loves You' tour ajanga Tsüngremi mapa tulu inyaksü yongyaa atar," ta

metetdaksü.

Tesüiba mepangtem nung Franklin Graham-i Laishiba nung ajemdaker kasa o kasa tetsür/tebur shi nung medenba aitsüba atema LGBT activist teloktem balalai UK tesem kar nung iba tour agitsü aliba nokdanga liasü.

2020 küm tetenzüklen-a UK nung iba sentong agitsü tesem kar thinenja liasü.

Yaküm October ita nung Scottish court kati, Scottish Event Campus Limited-i BGEA sentong thinenja ajanga U.K. Equality Act ozüng alema inyakogo, ta shia parnok dang teraksatsüba atema dollar sen 111,000 temenok agüjang, ta tuyua liasü.

UK nung God Loves You Tour yaküm May ita nung tenzük aser July ita nung tembanga liasü. Item sentong nung CeCe Winans aser Michael W. Smith nungeri ken aten.

Yaküm "God Loves You" tour UK nung nisung 1,400 dak temai Yisu Khrista agizük. Iba tour ya Liverpool, South Wales, Sheffield aser London nung agia liasü.

Yakümsa BGEA-i US kübok yimi trok nunga "God Loves You" tour agia liasü. 'God Loves You Tour' September ita tatembanglen Allentown, Pennsylvania nung tenzüka liasü aser October 2, 2022 nü Rochester, Minnesota nung tembang.

ANO GO ABEN TSÜNGREM DEN

Tasüngdangba Takang

T.Ken 119: 89 - 96

Alima nung terenemba takang mayur ta nai meteter asü? Yimtenren terenemba aika renemer saka teinyaktetba tera dang alir. Terenemba inyaksü agütsür saka tebenja teimba adoker. Ano renemshitsü jembir. Kodanga takang terenemba malir. Mapaji yamaji aor süra tekong 89ji repringang: O Kibuba, teti tatem maka, Nü o kotak nung akanga noktaka lir."

Shinga o akanga malir. Kü tebilemba aser amangba ni melenshir.Kodang ni kü o shidak yudir aji tamangtsü lir. Saka Tsüngrem O bo teti akanga akanga lir. Pa O atangji aser tamangtsü lir. Tsüngremi tiyazü jembitsü makok, anungji Pai Pa O nung melenshitsu ta asenoki shisabulua malitsüla.

Tsüngremji teti tatem makai atangji lir.Bazar nung, dokan nung teti oset jenjang melenshir. Tsüngrem O bazaar oset amaji masü. Yisui ashi, "Anüng ali suitemtsü, saka kü o tem kecha südanga süitema maotsü" (Matt. 24: 35).

Tsüngrem o memelenshir. Tsüngremi o langtepa mejembir. Pai tongmelang agi ashir, " Lemangji ibai lir aser aji yamaji dang alitsü."Paimapatemji koda bentetter nai metetnera, Pa O ji zügang.

Mapatem koda bentettsü Laishiba nung angur. Rara koda bentettsü Tsüngrem O nung ashir, tebilemstütem koda bentettsü aser temenen nungi koda kümdang alitsü, Tsüngremi ashir. Ajak rong nung tajungtibaji, kotaki koda aotsü Pai Pa O nung ashir.Iba nung ajak bentetter. Yisu Khrista asenok asoshi kangki nung asü, asenok kümzüksü tanaben shia aru aser tamang ajanga Pa dangi arur ajak Pai kümzükur.

Mesüngjemtetba taküm nung Tsüngrem O ji tashi aser tesangwa ama alir.Ibai atangji, teti tatem maka aser melenshitsu makok nung asenoki ibai amangtsü akok aser iba ochi O nung alitsü akok. Tsüngremi temenen, tasüba, tekümtet aser teti tatem maka taküm indang tasüngdangba ajak Pa O ajanga bentettsüogo. Nai iba tasüngdangba ne sasa bentettsü akok asü? Tsüngrem O ji zügang aser bushiang.

Haiti nung missionary nurse ka chiochtsü atema senmillion 1 akhanger

August 07, 2023: Tawa Haiti nung prangpong amer telok kati America tsür missionary nurse ka den lar jala puer aoba sülen parnoki tena chiochtsü atema dollar sen million 1 akhanger, ta osang ka ajanga metetdaksü.

New Hampshire nungi missionary nurse inyaker, Alix Dorsainvil ya Port-au-Prince nung melungtet telok ka nung inyaker; Christian ministry El Roi Haiti-i lapokba clinic ka nung lia la den lar jala na puer ao.

State Department otongdar, Matthew Miller-i, "Bendanglen alir America sensotem kümzüksüji onok atema tongtibangtiba mapa lir. Onoki Haiti nung ketdangsertem den maneni tongtepratepdar. Onoki maneni parnok aser US sorkar agency partners den külemi inyaksü," ta metetdaksü liasü.

Alix Dorsainvil ya Weston, Massachusetts nung aliba Regis College nung graduate asü. La ya Christian ministry El Roi Haiti tenzüksang aser organization director, Sandro Dorsainvil kinüngtsü lir.

Haiti nung ozüng alema tentetba telok balalai nisung pua anir oor sen million 1 akhangba ya tang tasen masü. United Nations report ajanga ashiba agi, Haiti nung nisung puer oa parnok chiochtsü atema sen akhangba ya kanga bulua atalokdar; taküm küm kija nunga January ita nungi June ita tashi nung nisung puer aoba tatalokba 1,014 lir.

Küm ana tejaklen-a Haiti nung 400 Mawozo teloki Christian Aid Ministries nungi missionary 17 pua liasü; parnoki mezüng missionary 5 chioch aser tesüsa tanüngba missionary 12 jia chiocha liasü.

**AO OSHI ANGAZÜKDAK:
TANÜ ANGAZÜKTSÜBA OJANG**



Rongjur

(n)rong nung senzür (voyager)

* **Rongjurtemi** tzüym nung ango aika apu.

Ronglok

(v)chipo nung chi aon mi agi neploka arong (outburn of food)

* Mi tali apua yutsüba agi aon **rongloker**liasü.

OLONG PAITEP # 6600

1		2		3		4	5		
				6					7
		8							
9				10		11			
			12					13	
						14			
16						17			

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S_ _ _ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rüzüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 6599 TELANGZÜBA

TIPIEN :

- 1. Tanga, 6. Wara, 7. Rajang,
- 9. Anük, 10. Jenjang,
- 11. Alar, 14. Ngashi, 15. Nala,
- 16. Mechi.

LANGTSÜNGLEN :

- 2. Anga, 3. Yabang, 4. Tarok,
- 5. Orak, 8. Ainer, 9. Anema,
- 10. Jabili, 11. Among,
- 12. Miim, 13. Anem.

TETSÜR TAR TALANGTIBA



Alima nung tetsürtem rongnung tar talangtibaji Turkey tsür Rumeysa Gelgi lir. La ya Guinness World Records title 5 abenba nisung ka lir aser la ya activist den public speaker ka lir. Rumeysa ya January 1, 1997 nü aso aser tang la arishi küm 24 jungogo. La indang tar tasazükji 215.16 cm (7ft 0.7in) lir. Rumeysa asoba sülen la dak Weaver Syndrome aliba putet aser iba ya nisung aika dak madokba genetic mutation ka lir.

Tanur asoba anogo nung salem osang den noksa angati adokdaksünöra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Assam nung süpokrem meshia agir Lot mandal ka apu



Guwahati, August 7, 2023 (Agencies): Assam nung Vigilance and Anti-Corruption (VAC) kettangsürtemi Hombarnü Lot mandal kati süpokrem meshia agidang apu. Assam kübok Sonitpur district nung Lot mandal kati nisung ka indang namjari yanglutsüsa atema Rs 4,000 meshia agidang apu. "Tanü Directorate of Vigilance and Anti-corruption kettangsürtemi Gohpur Revenue Circle, Biswanath nung Lot mandal Nowshad Ali sang nung puogo. Circle officer

indang office canteen anasa pai Namjari yanglutsü atema süpokrem meshia agidang apu" ta ADGP, Vigilance & Anti-Corruption-i metetdaksü. Iba Lot mandal ya Nuashad Ali ta jangjaogo aser pai nisung ka indang Namjari yanglutsü atema süpokrem Rs 10,000 meshia liasü saka tatem nung Rs 8,000 tashi pai ajem. "Iba nisung jagi süpokrem agütsütsü memulungba agi Directorate dang iba sorkar tenzüker dak ozüng tapet agi merenshitsu asüngdanga liasü" ta Assam Police-i ashi.

"Tanü Directorate of Vigilance and Anti-Corruption nungi telok kati Gohpur Revenue Circle indang circle officer office nung pa aputsü tasa ka atong. Tanü anüngdang 1:55 ako nung Nowshad Ali-i süpokrem nungi shilem ka Rs. 4,000 meshia agidang kettangsürtemi pa apu" ta Assam Police-isa metetdaksü. "Pa ket nungi süpokrem sen ngutetogo aser pa anema Prevention of Corruption Act, 1988 kübok pa anema ken o ka benokogo" ta parnokisa ashi.

Itanagar nung Section 144 ozüng benok

Itanagar, August 7, 2023 (Agencies): Arunachal Pradesh yimtiba Itanagar nung Section 144 CrPC ozüng benshitsu tetuyuba agütsüogo. Arunachal Pradesh nung social activist Sol Dodum-i August 7 nungi Tennis Court, Itanagar nung timi lungkak aitba sentong ka tenzüksü ta osang

sangoktsüba sülen Itanagar district magistrate (DM)-i iba tetuyuba agütsü. Sol Dodum-i iba sentong agitsü atema temelaba memeshi ta Itanagar district administration-i ashi. "Deputy commissioner, Capital Itanagar nungi iba sentong atema temelaba

kecha mememshi" ta Itanagar DM-i CrPC indang section 144 benokba sangdong nung shia lir. "Tennis Court nung ajungbena lungkak aitsü ayongzükba ajanga public atema meinprong adoktsü aser tensa raksatsü akok" ta Itanagar DM-isa ashi.

Manipur-i bener aoba tapoktsütem Cachar nung apu

Silchar, August 7, 2023 (Agencies): Manipur nung amshitsu atema tapoktsütem bener aoba Assam police-i puogo. Deobarnü Cachar district

kübok Ranighat nung police-i tapoktsütem apu. Iba mapang bomb yangludang amshiba gelatin sticks aser detonators 200 shi apu. Tapoktsütem ya lanur anati

bosta ka nung bena liasü saka police-i parnok soter mita reprangdang tena jena oadok. Ajsüsiaka Assam police-i FIR ka benoker maneni bushisüngdang südar.

**GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA**

No.DTE/CSAB.NEUT/1/2023

Kohima, dated the 5th August, 2023

NOTIFICATION ON CSAB-NEUT: 2023 SPOT ROUND COUNSELING

This is to inform all the JEE(MAIN)-2023 appeared candidates that the Spot and final round counseling for CSAB-NEUT:2023 is scheduled on the 9th, August, 2023 at the Directorate of Technical Education, below Nagaland Secretariat, Kohima against the vacant seats as indicated below. Interested candidates with valid JEE(MAIN)-2023 score is informed to submit application form to the office of the undersigned on or before 12:00 Noon, the 9th August, 2023. Counseling will commence by 1:00 PM, 9th August, 2023. Application form will be made available at the office by 7th August, 2023 or it can be downloaded from the website dtenagaland.org.in

Candidates who have withdrawn their allotted seats in round 1 & 2 are also eligible to participate on the spot round counseling. Candidates who did not register for round 1 & 2 are also eligible to participate. The candidates has to pay the seat allotment/acceptance fee of Rs. 4000/- (Rupees Four Thousand only) in cash, in the event he/she is selected in the Spot round Counseling. Interested candidates are directed to bring their documents in original on the day of the counseling.

Note: The vacancies are subjected to change depending on the number of the withdrawal candidate.

S.No	STREAM	Program	VACANCIES
1	BE/B.Tech	Architecture	1
2	BE/B.Tech	Civil Engineering	5
6	BE/B.Tech	Chemical Engineering/ Technology	5
7	BE/B.Tech	Computer Science	14
17	BE/B.Tech	COMPUTER T & INFORMATION	4
18	BE/B.Tech	Electrical and Electronics Engineering	8
19	BE/B.Tech	Electrical Engineering	11
24	BE/B.Tech	Electronics & Communication Engineering	12
27	BE/B.Tech	Electronics Engineering	7
32	BE/B.Tech	Mechanical Engineering	24
40	B.PHARM	Pharmacy	1
TOTAL			92

(ER.VIPULHOU LHOUNGU)
DIRECTOR

Cambodia PM Jabaso-i pa melentsü chubai melaogo

Phnom Penh, Luroi/August 07 (Agencies): Cambodia nung mapang talangka yimsü süa arusanger jabaso tambosang ato kilonser akumtsü temelaba agütsüogo.

Hombarnü Cambodia chubai sangdong ka agütsüba nung Hun Manet-i Hun Sen melentsü ta ashi, shibai küm 38 tashi yimsü süa aru.

July 23 nü election agir anogo ishika dang lir Hun Sen-ato kilonser menden azüngtsütsü ta ashi, koba pa anemer temi democratic yimya masü ta aitsü.

Opposition telok tuluba election nung shilem magidaksüi nokdangba sülen parliament nung par party-i menden pongu dang yutsür tanüngba ajak nung takok angu.

Hun Sen-i temepishiba shiti ka züluba sülen King Norodom Sihamoni-i iba osang ya sangdonga liasü.

Arishi küm 45 tain Hun Manet ya tawa tashi Royal Cambodian Army nung commander liasü aser pai yimsü asütsü mapang talangka nungi renemshia aru.

Pa ato kilonser akumba ya August 22 nü parliament nung agizütsü nungdaker, saka National Assembly nung pai tetsükdak makai ajangtetsü imlar, kong menden 125 aliba nungi menden 120 bo Hun Sen'er Cambodian People's



Hun Manet

Party kübok lir.

Hun Manet'er cabinet tasenba nungya lanurtem adentsü imlar. 1970s aser 80s mapang Khmer Rouge revolution aser civil war mapang Hun Sen den külemi alir aika menden nungi aluogo aser aikati pei chir nem parnok mapa agütsü.

Ato kilonser menden melenzütsütsü ya 2021 küm mezüng temai adok, saka kodang agütsüjar July ita tashi mejangjai liasü.

Ajisüaka election agir asemnü lir Hun Sen-i pa menden nungi alutsü sangdong. Pa ya alima nung linük lenir talangtiba inyakba rongnung ka lir, shibai nütsüng yongsük million 16 aliba South East Asia linük küm 40 jungnüa yimsü süa aru.

Cambodia tashi ita alitsü mechi pa mapa nungi anener, ta iba mapang pai shia liasü.

Ajisüaka Hun Sen ya tang yimsü tesüdak Cambodian

People's Party lenir inyaksü, anungji pa dak tashi tulu alitsü südi ta ashir.

1985 küm nungi tenzüka pai yimsü süa arudang yimten tashi ajak pa keti arudaksü aser pa anemer tem tepuokdak ayu mesüra bendang limai meindok.

Hopta tatemi pa arishi küm 71 ajungba benjongmung den külemi July election nung par party ajanga takok anguba sangdonga liasü, koba US, EU aser danga anüolen linük temibo shidak magi ta ashir.

Honibarnü election result benjonga Hun Manet-i Instagram nung noksa ka lemsatepba nung par jabasoi Hun Sen nem naro tepong ka agüja liasü aser "Akumtsüboa aliba aser meima aliba obala dang tepela tasoba anogo salem abener," ta zülua liasü.

Phnom Penh nungi Hun Manet ya MP ka ama election nung shimba indang tebuti Honibarnü jangjatsü, anungji pa ato kilonser menden nung amentsü asoshi inyakyim balala nung tetsükdaksü anünga aliba agiener.

Küm ishika tsüngta Cambodia nung opposition tejangja ajunga shibangtsür asünung Hun Manet-i tetsükdaksü kangabo majurutsü. Ajisüaka tebuti tashi tait aser takataiter kibongtem den tesendaktep yanglua aliba ketdangtsütsü tasak alitsü.

China, Russia navy Alaska nung inyaksangshiba sülen US-i warship tem yok

Washington, Luroi/August 7 (Agencies): Russia aser China na indang navy Alaska tzüküm anasa patrol senzüba sülen United States-i navy warship pezü iba tesemi yoka liasü, ta Wall Street Journal (WSJ) sangdong ka ajanga metetdaksü.

Russia aser China nunger rong 11 Alaska kübok Aleutian asetkong anasa inyaksangshia liasü, ta WSJ-i metetdaksüba den item rongtem ya US indang tzyüimibo maiti meyipa oatok, ta shisem.

"Iba ya puti otsü nung mezüngbuba," ta Heritage Foundation nung senior research fellow aser taoba mapang navy captain Brent Sadler-i ashi.

"Ukraine nung rara aser Taiwan temeket nung mangatettep adoker aliba mapang iba inyakyim ya tensa rongshiba inyakyim ka lir," ta ashi.

US Northern Command-ia inyakyim indang jangjashitsüogo, "onok ket nung aliba tayimtsü aser rongtem yoka United state aser Canada kümzüka ayutsü asoshi inyaksangshio. Patrol ya international tzyüim nung dang ayongzüka agi anungji amokmeren ka ama

mezüngshir," ta ashi.

Alaska indang Republican Senator Dan Sullivan aser Lisa Murkowski nati ashiba agi, parnoki Alaska Command nungi lenirtem den anogo ishika tongtepratepa aruogo aser bendanger rongtem linük tzüküm anasa inyaksangshia aliba indang osang tejangja agizükogo.

Kasa mapang nung Washington nung Chinese embassy nungi otongdar kati ashiba agi, patrol senzüba ya Washington dak rangloker inyaksangshiba masü.

"China aser Russia military tenangzüktepba kübok linük ana nungi navy indang rongtemi western aser northern Pacific Ocean nung maritime patrol ayongzüka agiogo. Iba inyakyim ya tangar ka dak rangloker agiba masü aser tang international aser regional nung mepetmesü adoker aliba dak kecha sendaka mali," ta Chinese embassy otongdar Liu Pengyu-i ashi.

Sullivan aser Murkowski natisa iba amala inyakyim ta tang mezüngbuba benoka inyaker masü aser 2022 küma iba amala mesükba inyakyim ka benoka inyakogo, ta ashi. 2021 küm September ita

Bering Sea aser North Pacific Ocean nung US Coast Guard cutters temi Aleutian asetkong nungi km 80 shi pilar China nunger indang rongtem ajurua liasü.

Bering Sea nung 2015 küm mezüngbuba China nunger indang navy rong senzüba mangaoka lir. Iba küm amphibious rong ka, replenishment vessel ka aser surface combatant rong asem iba tzyüim nung senzüba osang agüja liasü.

Pakistan train tsükokba lendong nung asür 30 jungogo

Islamabad, Luroi/August 7 (Agencies): Pakistan anüoletiplen train ka tsükokba lendong nung asür nisung 30 aser yirur nisung 100 jungogo, ta police otongdar kati metetdaksü.

Hazara Express train indang takdang ishika Nawabshah nung Sahara railway station anasa meküpoka liasü.

Train tsükokba lendong nung yirur alirtem anasatiba mozüki bushia anir ao aser kasa mapang nung teküzmükertemi nüburtem train tsükoker aliba nungi anitetsü meranga liasü.

Pakistan indang antiquated railway system nung lendong atalokba ya tang tasen masü.

Social media nung prokshiba video tem nung nisung aika

Office of The
Mokokchung District G.B.'S Association
SANGDONGER
Commissioner of Nagaland, Kohima Office Order dak ajemdaker.
G.B's tem asoshi osang ka sangdonger.
G.B's tem shirsa 2022-2023 kum sodi mesüra tasür lir (Küm ter (10) tema inyaker) G.B'S corpus fund apply asütsü atema 12th August 2023 tashi nung M.D.G.B.A ketdangpur ket tongtsüang
Nüngdakba Documents
1. Govt. appointment order
2. Yimtsüng Council/Ward Council Kuli
3. Medical Certificate
4. Aadhar (Photocopy)

Sd/- Along Jamir G.B President, MBGBA M.No - 7005207249	Sd/- M.Temsu G.B Gen/Secy., MBGBA M.No - 7085175326
--	--

Niger mitkar leniri linük indang airspace shibang

Niamey, Luroi/August 07 (Agencies): Niger nung mitkar tashi amshia sorkar atsüngdokba nung lenir temi linük indang airspace shibangogo aser kidanger linüktem nungi mitkar teka sangshitsü amokmerenba ajanga iba mera ya agi ta ashir.

Tayimtsü tsüngsü apuba website Flightradar24 nunga Niger anüng nung tang tayimtsü kata mali ta sayur.

Tir Mohamed Bazoum ya Deobarnü 23:00 (GMT) ako tashinung tanaben tir menden nung memendaksüra sepai tashi amshitsü, ta West African linüktemi tentetba telok ECOWAS ajanga tekumdangtsü shia lir.

Mitkar lenirtem indang odongtar kati ashiba agi, Niger indang armed forces tem linük wazüka ayutsü renema lir.

Bazoum ya July 26 nü apu aser presidential guard indang commander Gen Abdourahmane Tchiani-i pasasa pa lenir tasenba ta sangdonga liasü.

Mitkar temi Niger yimten agiba atema iba linük nung taoba mapang yimsü süa aliba France aser tanüngba European Union aser United Nations aser United States densema linük balalai aitsü.

Deobarnü national television nung sangdong ka zünga ashidang "foreign power" ajanga Niger amaktsü renemba osang lir ta Niger mitkar lenir

Niger nung atalokba atema Nigeria nung senden ka amenba sülen ECOWAS military chiefs temi Hokulbarnü ashiba agi, mitkar tashi amshitsü sentong tejangja parnoki yangluogo.

"Niger nung teka sangshitsü asoshi nüngdakba rongsen, koba aser kodang sepaitem yoktsü, item ajak inyaktepogo," ta Abdel-Fatau Musah, Ecowas commissioner for political affairs, peace and security ajanga ashi.

"Onoki tajunglen nungi mapa inyakner aser parnoki inyaka aliba melenshitsü asoshi onoki maongka ajak agütsür ta parnok (Niger mitkar) nem angatetdaksüner," ta paisa ashi.

ECOWAS ya West Africa nung linük 15 agi kumtetba telok ka lir, kong Nigeria, Senegal, Togo aser Ghana densema lir.

Mitkar lenirtemi yimten tashi meyipa agütsütsü molunga aliba mesayur aser Deobarnüa parnok bukumer nisung meyirijang aika Niger yimtiba, Niamey nung aliba stadium ka nung adenshia liasü.

Niger kidanger linük ana - Burkina Faso aser Mali - ajanga Niger nung mitkar teka sangshira ajibo parnok anema rara sangdongba ama züngshitsü ta tekumdangtsü shia liasü. Burkina Faso aser Mali ya ECOWAS züngsem lir, saka mitkar temi yimten atsüngdokba sülen iba telok nungi anenja lir.

senzütepba aser kar train takdang meküpoker aliba nungi ayateta adokba sayuogo.

Train tsükokba lendong nungi jenbor rongnung passenger kati BBC Urdu dang ashiba agi, pai tetsür aser tanurtem aika ali nung mepidaka aliba nguogo.

"Parnok asatepa liasü. Ni kechi inyakjar mejangjai aküm. Ni süjia orr alirtem shia arudisü ta ser kü tebu nung tzyüi bener arua parnok tejak nung inokja liasü," ta Naseer Ahmed-i ashi.

Nasser-i ashiba agi, train meküpokba mapang pa kichiba nungi tsükba ajanga kümzüka liasü.

Kasa mapang nung Railway Minister Saad Rafiq-i ashiba agi, bushisüngdangba sülen train ya

teti senzüba speed nung dang senzüa liasü aser parnoki train kodaser lenmang nungi tugua meküpoktsüsa aküm aji jangjatsü merangdar. Train ya engine nung timtem adokba mesüra kari tsükokdaksütsü merangba ajanga tsükok asütsü akok, ta pai ashi.

Karachi nungi railway otongdar kati ashiba agi, train takdang ti tashi lenmang nungi tugua meküpoka liasü.

Pakistan nung 2021 küma Sindh province nung train ana tsüktepba sülen nisung 40 asü aser aika yirua liasü.

2013 nungi 2019 küm tashi nung iba amala mesükba lendong nung nisung 150 süogo, ta local media sangdong ajanga metetdaksü.

World Cup: England aser Australia na quarterfinal-i iogo



Nigeria tsür Ashleigh Plumtre (tabelen) aser England tsür Lauren Hemp na ball raktepa noksa nung angur.

Luroi/August 7, 2023

(Agencies): Hombarnü FIFA Women's World Cup 2023 round of 18 asaya ka nung England tetsür team-i penalty asayaba sülen Nigeria team kokogo.

Asaya nung team kati danga goal magütsüteti tembangba sülen tetsür World Cup nung tekuben asayaba mapang tang mezüngbuba Nigeria team-i knockout asaya ka akoktsü atema maongka nguteta liasü.

Ajisüaka European champion England-i penalty ka dang midaktsüteti asaya 4-2 agi akok.

England team Honibarnü quarterfinal nung Colombia mesüra Jamaica den asayatsü.

Defending champion U.S. team asayamung nungi tsükatokba sülen iba

asayamung akoktsü imlartern rongnung England team temaba jenjang nung lir, ajisüaka Nigeria den asayaba mapang parnoki Nigeria indang defense majangteti liasü.

England atema ano tia tamajungba kümshidakja parnok rongnung nungtugu asayar James asaya tembangsü minute pongu anunga lia red card agütsür asaya nungi tugudatsü. Lai Nigeria team defender ka dak ajemoktsüba atema red card tetezü la asaya ka nungbosa masayatetsü aser parnoki taruba asaya mekokra asayamung nung asaya ka nung danga shilem agitsü asoshi maongka mangutsü.

Kasa asayamung nung co-hosts Australia-i goal 2-0 agi Denmark madak takok ngua

quarter-finals-i iogo.

Asaya nung Australia atema mezüngbuba goal ya minute 29buba nung Mary Fowler-i agütsüba ball ka Caitlin Foord- idakja liasü.

Maneni asaya nung tanabuba goal ya Hayley Raso-i minute 70buba nung idakja liasü.

Australia team Honibarnü quarter nung France mesüra Morocco den asayatsü.

Australia team-i tang tashi nung World Cup nung 2015 küm dang quarter final tonga asayadanga lir. Iba masüdag küm pezü tashi parnok knock out round nung dang tsüka liasü.

Kasa mapang nung Denmark pur 2007 küm World Cup sülen taküm mezüngbuba asayar liasü aser küm 28 sülen taküm mezüngbuba round of 16 tongteta liasü.

BAI-i World Junior Championships atema asayartem sangdongogo

Luroi/August 7, 2023

(Agencies): Taruba BWF World Junior Championships 2023 atema Badminton Association of India (BAI)-i India nung asayar 16 tenüng sangdongogo aser India team ya Ayush Shetty aser Unnati Hooda nati anir asayatsü. Iba asayamung ya Spokane, USA nung September 25 nü nungi tenzüka asayatsü.

July 26 nungi 29 tashi New Delhi nung trials ayongzüka agiba sülen asayamung atema asayartem shimogo.

"Trial kanga toktepa asayaogo aser iba amala international asayamungtem atema trail agitsü telemteba agiba sülen asayar tasen aika nguogo. Onoki shimba asayartem dak kanga temulung asür aser lanur asayatemi tajungtiba asaya linük nema dangdaksütsü ta amanger," ta Badminton Association of India

(BAI) General Secretary Sanjay Mishra-i ashi.

Odisha Open, 2022 Champion, Unnati Hooda-i anir tetsür kija asaya asayatsü kong BWF World ranked players, Tara Shah (World No 7) aser India nung jenjang 7buba nung aliba asayar Devika Sihag na densema lir.

U19 All India Junior Ranking Champion anaben tashi koker alisang Ayush Shetty-i anir teburtem asayatsü. Pa den ano Tushar Suveer, aser Lokesh Reddy nata shimogo.

BWF World Junior Championships ya September 25 nü mixed team championships asaya tenzüksü aser kija asayatem October 2 nü tenzüksü.

Indian Junior Badminton Squad (Team Event)

Boys' Singles: Ayush Shetty, Tushar Suveer, Lokesh Reddy, Nicholas Nathan Raj

Girls' Singles: Unnati Hooda, Tara Shah, Devika Sihag, Shriyanshi Valishetty

Boys' Doubles: Nicholas Nathan Raj/Tushar Suveer, Divyam Arora/Mayank Arora

Girls' Doubles: Radhika Sharma/Tanvi Sharma, Vennala K/Shriyanshi Valishetty

Mixed Doubles: Samarveer/Radhika Sharma, Sathwik Reddy K/Vaishnavi Khadkekar

Indian Junior Badminton Squad (Individual Event)

Boys' Singles: Ayush Shetty, Tushar Suveer, Lokesh Reddy

Girls' Singles: Unnati Hooda, Tara Shah, Devika Sihag

Boys' Doubles: Nicholas Nathan Raj/Tushar Suveer, Divyam Arora/Mayank Arora

Girls' Doubles: Radhika Sharma/Tanvi Sharma, Vennala K/Shriyanshi Valishetty

Mixed Doubles: Samarveer/Radhika Sharma, Sathwik Reddy K/Vaishnavi Khadkekar.

WFI Elections atema candidate tem tatembangbuba list sangdongogo

Luroi/August 7, 2023

(Agencies): Taoba mapang India nung nungtugu wrestling asayar aser Asian Games nung gold medal ana tashi ngur alisang Kartar Singh, August 12 nü agitsü aliba Wrestling Federation of India (WFI) election nung tatong tir mapa atema tokteper pongu rongnung densema lir,

Kartar ya taoba mapang WFI secretary-general liasü aser pai tajangshiba aika bena lir. Pa iba mapa atema Asit Kumar Saha (Bengal), Jai Prakash (Delhi), Mohan Yadav (Madhya Pradesh) aser N Phoni (Manipur) nung den tokteptsü.

Tri mapa atema taoba WFI tir Brij Bhushan Sharan Singh den kanga junga sendaktepa alisang Sanjay Kumar Singh (Uttar Pradesh) aser 2010 Commonwealth Games gold medallist Anita Sheoran na tokteptsü.

Osang ajanga ashiba agi arishi küm 38 tain Sheoran nem Bajrang Punia, Vinesh Phogat aser Sakshi Malik nung densema wrestler troki teyari agütsüdar.

Kasa mapang nung Sheoran ya Brij Bhushan anema sexual harassment ken o benoka aliba nung tenük kuli agütsür ka lir.

Election atema returning officer Justice (ret'd) MM Kumar-i Hombarnü sangdongba list nung joint secretary mapa ana atema

candidate pezü lir aser executive committee mapa atema tokteper tenet lir.

Brij Bhushan'er teloki mapa 15 prongla atema nomination file süogo aser osang ajanga ashiba agi par teloki mapang tongtibang tenetbo akoktsü.

Senior vice-president mapa atema Brij Bhushan'er telok nungi ID Nanavati aser Assam nungi Devender Kadian na tokteptsü imlar.

Election ya tir (1), senior vice-president (1), vice-president (4), secretary-general (1), treasurer (1), joint secretary (2) aser executive members (5) atema agitsü.

Candidate tem tatembangbuba list yamai alitsü:

President: Anita Sheoran, Sanjay Kumar Singh.

Senior vice-president: Devender Kadian, ID Nanavati.

Vice-president: Asit Kumar Saha, Jai Prakash, Kartar Singh, Mohan Yadav, N. Phoni.

Secretary-general: Darshan Lal, Prem Chand Lochab.

Treasurer: Dushyant Sharma, Satya Pal Singh Deshwal.

Joint secretary: Bellippady Gunaranjan Shetty, Kuldip Singh, RK Purushotham, Rohtash Singh.

Executive members: Ajay Vaid, M. Loganathan, Neivikuolie Khatsii, Prashant Rai, Rajnish Kumar, Ratul Sarma, Ummed Singh.

Bhagat aser Kadam nati Four Nations Para-Badminton International nung gold angu

Luroi/August 7, 2023

(Agencies): SL3-SL4 category nung tebur tarep asayar rongnung temaba jenjang nung aliba tarep Pramod Bhagat aser Sukant Kadam nati Four Nations Para-Badminton International nung gold medal nguogo.

Nungtugu asayar Pramod Bhagat-i kasa asayamung SL3 category kija asaya nung silver medal aser SL 3- SU 5 category tarep temeyoktep asaya nung Manisha Ramdass den bronze medal nguogo. Sukant Kadam-i SL 4 category kija asaya nung silver medal nguogo.

World No 1 tarep Pramod aser Sukant nati külem India nung tarep Deep Ranjan Bisoyee aser Manoj Sarkar na koka tebur tarep asaya nung gold medal nguogo. Tenati asaya amokbaner asaya aser Deep o Manoj nem nem kecha maongka magütsü.

Final asaya ya Pramod aser Sukant nati 21-17, 21-17 agi koka liasü.

Kija asaya final nung Pramod-i kanga meranga asaya ajisüaka pai England nung asayar Daniel Bethell 21-8, 21-10 agi mekoki liasü.

Tarep temeyoktep asaya nung Pramod aser Manisha Ramdass na ya Indonesia nung tarep Hikmat Ramdani aser Leani Ratri Oktilla nati 17-21, 17-21 agi koka liasü.

Asaya indang jembiba mapang Pramod-i, "tarep temeyoktep asaya akokba atema kanga pelar aser kasa mapang nung kija asaya aser tarep temeyoktep asaya mekoktetba atema nemjema bilemer. Taküm Daniel Bethell ya kü atema opponent tajang ka lir aser pa akoktsü atema ni tajungba asayatsü nungdaker. Ni asayamung temli training agi tenzüksü aser tashimait kechi ali aji metongshitsü atema inyaksü," ta ashi.

Maneni kasa asayamung tebur kija asaya semifinal nung Sukant Kadam-i Indonesia nung asayar Fredy Setiawan mekoktetba bronze medal dang angu. Iba asaya nung mezüngbuba set bo Sukant-i 21-7 agi akok ajisüaka Indonesia nung asayar yagi asendenshir kanga junga asaya tanungba set ana ya 15-21 aser 16-21 agi koka liasü.

BILEMDANGANG

"Tepelaji nü dak nungi tenzüksü."